

氏族典第三百二十一卷

曾姓部彙考

歐陽修集 曾諫議神道碑

維曾氏始出於鄒鄒爲姒姓之國微不知其始封春秋之際莒滅鄒而子孫散亡其在魯者自別爲曾氏蓋自鄒遠出於禹歷商周千有餘歲常微不顯及爲曾氏而點參元西始有聞於後世而其後又晦復千有餘歲而至於公

鄭樵通志 以國爲氏 周異姓國

曾氏亦作鄒亦作繒姒姓子爵今沂州承縣東八十里故鄒城是也夏少康封其少子曲烈于鄒襄六年莒滅之鄒太子巫仕魯去邑爲曾氏見世本巫生阜阜生皙皙生參字子輿父子並仲尼弟子參生元申裔孫偉後漢尚書令望出魯國

廖用賢尚友錄 曾姓

曾魯國徵音又望出廬陵

曾姓部列傳

周 曾天

按左傳昭公元年叔孫歸曾天御季孫以勞之

曾阜

按左傳昭公元年叔孫歸曾天御季孫以勞之旦及日中不出曾天謂曾阜曰旦及日中吾知罪矣魯以相忍爲國也忍其外不忍其內焉用之阜曰數月於外一旦於是庸何傷賈而欲贏而惡讟乎阜謂叔孫曰可以出矣叔孫指楹曰雖惡是其可去乎乃出見之

曾蒧

按史記仲尼弟子列傳曾蒧字皙侍孔子孔子曰言爾志蒧曰春服既成冠者五六人童子六七人浴乎沂風乎舞雩詠而歸孔子喟爾嘆曰吾與蒧也

曾參

按史記仲尼弟子列傳曾參南武城人字子與少孔子四十六歲孔子以爲能通孝道故授之業作

孝經死於魯

曾元 曾申

按禮記檀弓曾子寢疾病曾元曾申坐於足注元與申曾子子也

曾華

按大戴禮曾子疾病曾元抑首曾華抱足

曾西

按孟子趙岐注曾西曾子之孫

漢 曾譚

按萬姓統譜譚泉陵人舉孝廉拜尚書郎有文武才官終太常

後漢 曾偉

按鄭樵通志偉後漢尚書令

唐 曾芳

按尙友錄芳爲程鄉令因民苦瘡以藥濟之求者接踵乃以大囊藥置井中令民汲水飲之而疾愈後人名其井爲曾井宋仁宗賜飛白書曾氏忠孝泉五大字

後梁 曾文迪

按尙友錄文迪雩都人天文識緯黃庭內景之書靡所不究而地理尤精梁貞明間遊至袁州府萬載縣愛其縣北西山之丘謂其徒曰死葬我於此及卒葬其地後其徒在豫章忽見之駭然而歸啟其墳墓視之乃空棺也人以爲尸解云

後周 曾崇範

按尙友錄崇範廬陵人竈薪不屬而讀書自若家藏九經子史南唐刺史賈皓就取進之以己緡償其直崇範笑曰墳典天下公器世亂藏於家世治藏於國其寔一也何估值以償邪召授太子洗馬遷東宮使

宋 曾文照

按尙友錄文照七歲應南唐童子科擢第三江南平爲永城令上疏論邑利害免挽船戶力歲省萬

計遷蒙城令蝗不入境官終大理司直

曾致堯

按宋史曾致堯傳致堯字正臣撫州南豐人太平興國八年進士解褐符離主簿三遷著作佐郎改祕書丞出爲兩浙轉運使徙知壽州轉太常博士致堯性剛率好言事前後屢上章奏辭多激訐真宗卽位遷主客員外郎歷知泰泉蘇揚鄂五州大中祥符初遷禮部郎中坐知揚州日冒請一月奉降掌昇州權酷轉戶部郎中五年卒子易從易占皆登進士第

曾會

按泉州府志會字宗元晉江人端拱二年進士第二人授光祿寺丞直史館謁告還朝以親老願補郡遷殿中丞知宣州祥符末由三司判官出爲兩浙轉運使歷真宗仁宗世凡出入四十五年歷典七郡至刑部郎中集賢殿修撰知明州卒子公度公亮

曾乾度

按萬姓統譜乾度字順承文照子淳化三年進士兩任推官三爲縣五興州年甫六十懇請分司南

京再求監舒州靈仙觀時張仕遜爲相言乾度風力方邁使臥理一郡亦足以厚風俗乃起知筠州不赴遂以太常少卿致仕率諸生興學校教以孝弟幅巾徜徉縉紳榮之

曾易占

按尙友錄易占字不疑始監眞州御米倉遷太子中允太常丞知泰州如臯信州玉山四縣皆有政績後以子拜相追封魯國公子三人輦布肇

曾奉先

按萬姓統譜奉先字紹宗篤志力學登進士判羅源簿有清名歐陽文忠公推重之陞賀州法曹

曾朝陽

按萬姓統譜朝陽永豐人慶曆間登第爲石首令寬其賦稅改忠州從事教民從事文學有文集二十卷弟匪亦同登第爲南安主簿邑有寇獨力擒之辭賞不受改龍南令設學以教其子弟後移至玉山朝陽縣子元中大觀間登第屢官廣州教授所著有春秋歷法論語解周易解等書門人私謚文節先生

曾公亮

按宋史曾公亮傳公亮字明仲泉州晉江人舉進士甲科知會稽縣改諸王府侍講授集賢校理擢天章閣待制知制誥以翰林學士知開封府擢給事中叅知政事除樞密使嘉祐六年拜吏部侍郎同中書門下平章事熙寧二年進昭文館大學士累封魯國公以老避位三年拜司空明年起判永興軍旋以太保致仕元豐元年卒諡曰宣靖公亮方厚莊重沉深周密平居謹繩墨蹈規矩然性吝嗇殖貨至鉅萬帝嘗以方張安世

曾叔卿

按宋史曾叔卿傳叔卿建昌南豐人輩族兄也家苦貧居鄉介潔非所宜受一介不取妻子困於饑寒而拊庇孤嫠唯恐失其意起家進士至著作佐郎熙寧中卒

曾鞏

按宋史曾鞏傳鞏字子固建昌南豐人中嘉祐二年進士第調太平州司法叅軍遷館閣校勘集賢校理出通判越州知齊州其治以疾姦急盜爲本徙襄州洪州加直龍圖閣知福州徙明毫滄三州

過闕神宗召見遂留判三班院丁母艱去卒

曾布

按宋史曾布傳布字子宣南豐人登第調宣州司戶叅軍懷仁令熙寧二年以韓維王安石薦授太子中允歷遷戶部尙書元祐初以龍圖閣學士知太原府歷眞定河陽及青瀛二州紹聖初徙江寧過京留爲翰林學士拜同知樞密院進知院事徽宗立拜布右僕射召蔡京爲左丞京與布異會布擬陳佑甫爲戶部侍郎京奏曰爵祿者陛下之爵祿奈何使宰相私其親布壻陳迪佑甫子也布忿然爭辨御史遂攻之罷爲觀文殿大學士知潤州京積憾未已加布以贓賄布落職提舉太清宮太平州居住又以棄湟州責賀州別駕又責廉州司戶徙舒州復大中大夫提舉崇福宮大觀元年卒于潤州後諡曰文肅

曾肇

按宋史曾肇傳肇字子開舉進士調黃巖簿用薦爲鄞州教授擢崇文校書館閣校勘同知太常禮院遷國史編修官進吏部郎中遷右司爲神宗實錄檢討元祐初擢起居舍人未幾爲中書舍

人以寶文閣待制知潁州徙鄧齊陳州應天府入爲吏部侍郎出知徐州歷泰州海州徽宗卽位復召爲中書舍人遷翰林學士建中靖國元年出知陳州歷太原應天府揚定二州崇寧初落職謫知和州徙岳州繼貶濮州團練副使安置汀州四年歸潤而卒紹興初諡曰文昭子統至左諫議大夫

曾準

按萬姓統譜準字子中贛州人嘉祐間進士知公安縣火燔民居準以身叩之風反滅火復通判臨江明慎刑獄芝草生園扉或勸以獻準抑之長子楸少穎悟官至吏部尙書

曾孝寬

按宋史曾公亮傳公亮子孝寬字令綽以蔭知桐城縣選知咸平入知審官東院判刑部熙寧五年遷樞密都承旨擢拜樞密直學士簽書樞密院丁父憂除喪以端明殿學士知河陽以吏部尙書召道卒

曾孝廣

按宋史曾公亮傳公亮從子孝廣字仲錫元豐末爲北外都水丞元祐中出通判保州久之除京西

轉運判官入爲水部員外郎遷都水使者累擢戶部侍郎進尚書坐錢帛不給費罷知杭州移知潭州鄆州饒州徙廣州歷成德軍太原府卒孝廣泄官以嚴稱獲盜輒碎其手焉

曾孝蘊

按宋史曾公亮傳公亮從子孝蘊字處善紹聖中管幹發運司糴糴事提舉兩浙常平改轉運判官知臨江軍召爲左司員外遷起居舍人言者論其與張商英善出知襄州徙江浙荆淮發運召爲戶部侍郎徙工部以顯謨閣待制知杭州坐累貶安遠軍節度副使宣和二年始復天章閣待制知歙州移青州改杭州卒

曾孝序

按宋史曾孝序傳孝序字逢原泉州晉江人以蔭補將作監主簿監泰州海安鹽倉因家泰州累官至知青州高宗卽位陞延康殿學士先是臨朐土兵趙晟聚衆爲亂孝序付將官王定兵捕之失利而歸孝序責以力戰自贖定乃以言撼敗卒奪門斬關入孝序出據廳事瞋目罵之遂與其子宣教郎訐皆遇害城遂陷知臨淄縣陸有常率民兵拒守死於陣知益都縣張侃千乘縣丞丁興宗亦死

之孝序諡威愍

曾孝純

按泉州府志孝純字君施公亮卒詔蔭孝純爲殿中丞賜同進士出身紹興中擢太常執政沮之遂杜門不仕

曾紆

按尙友錄紆布第四子工詩詞材高識明博極書史以文章翰墨風流醞籍爲時名勝官至大中大夫

曾懋

按萬姓統譜懋字叔夏準長子少穎悟落筆驚流輩登元符三年進士知興化拒楚命表高宗勸進扈從隆祐孟太后至虔軍民偶忿爭賴以撫定累官吏部尙書著內外制十卷東宮日記十卷

曾誕

按宋史鄒浩傳曾誕公亮從孫也孟后之廢誕三與浩書勸力請復后浩不報及浩以言南遷誕著

玉山主人對客問以譏之其書既出識者或以比韓愈諍臣論誕仕亦不顯

曾肅

按萬姓統譜肅太人居父喪廬墓數年有慈烏來巢人以爲孝所感子安止登科爲彭澤令掛冠歸隱安中未冠登第上書言時政入黨籍安強爲進士提舉成都路常平嘗葬暴露不葬者三十餘
柩

曾有開

按萬姓統譜有開知衛州時水災人乏食擅貸常平錢粟與之具奏乞蠲其息

曾開

按宋史曾幾傳幾兄開字天游少好學善屬文崇寧間登進士第調真州司戶累擢起居舍人忤時相意責監大寧監鹽井召還除知和州恩州請祠得鴻慶宮欽宗卽位除顯謨閣待制知潁昌府奪職奉祠建炎初復職知潭州求去復得鴻慶宮起知平江府居二年盡平羣盜提舉太平觀復以中書舍人召請去進寶文閣待制知鎮江府召爲刑部侍郎遷禮部時秦檜專主和議開引古誼以折

之檜怒提舉太平觀知徽州以病免居閒十餘年卒

曾幾

按宋史曾幾傳幾字吉甫其先贛州人徙河南府兄弼弼死無後特命幾試吏部賜上舍出身擢國子正選辟雍博士除校書郎久之爲應天少尹靖康初提舉淮東茶鹽高宗卽位改提舉湖北會兄開與秦檜力爭和議開去幾亦罷逾月除廣西轉運副使徙京南路紹興七年爲浙西提刑知台州賀允中薦召對授祕書少監孝宗受禪請老致仕擢其子逮爲浙西提刑以便養乾道二年卒諡文清二子逢仕至司農卿逮終數文閣待制

曾升

按福州府志升字孟高福州人入粟補吏靖康中金騎犯邊升被檄部士卒戍楚州至昭信縣適遇金人與戰死於陣

曾光庭

按萬姓統譜光庭吉水人仕爲永州東安簿靖康之難勒兵勤王會徽欽北狩列表勸進高宗立光

庭不願受賞

曾憲

按宋史曾憲傳憲字仲常中書舍人鞏之孫以父任郊社齋郎累官司農丞通判温州須次於越建炎二年金人陷越以憲八爲帥約詰旦城中文武官並詣府有不至及藏匿不覺察者皆死憲獨不往爲鄰人糾察逮捕見憲八辭氣不屈憲八令左右盡驅其家屬四十口同日殺之金人去憲弟朝散郎憲時知杭州餘杭縣事製大棺斂其骨葬之天桂山事聞官其弟憲子憲兄子寔皆將仕郎憲後仕至知南安軍

曾悟

按宋史曾憲傳憲從弟悟字蒙伯翰林學士肇之孫也宣和二年進士靖康間爲亳州士曹金人破亳州悟被執抗辭慢罵衆刃刺之妻孥同日被害

曾覲

按宋史曾覲傳覲字純甫其先汴人也用父任補官紹興三十年以寄班祇候與龍大淵同爲建王

內知客孝宗受禪覲自武翼郎除帶御器械幹辦皇城司未幾以爲文州刺史覲勢張甚士大夫之寡恥者附麗之覲累除武泰軍節度使提舉萬壽觀淳熙元年除開府儀同三司陳俊卿守金陵過闕入見首言曾覲招權納賂帝感悟寢覺其姦遂稍疎覲覲憂患疽發於背卒

曾伋

按萬姓統譜伋字彥思紹興三十二年以大理寺丞出知袁州一意爲民隆興初元有旨江西和糴百萬轉輸丹陽一時有司失於討論袁亦在數伋具不可糴狀條舉先後以聞乞先罷黜朝廷嘉而免之是邦得免和糴自伋始

曾項

按萬姓統譜項紹興中宰常熟王伯剛稱其知足以知勇足以行御史若西門之治鄴愛民如子產之治鄭云

曾集

按萬姓統譜集紹興間知南康軍勤理庶務首募先賢劉煥之爲人修其墓亭礮石以培其封割公

田以奉其祀朱熹稱其有尊賢尚德之心

曾恬

按泉州府志恬字天隱公亮曾孫少爲存心養性之學紹興中仕至大宗正丞秦檜當國恬自守不爲詘求外祠得主管台州

曾慥

按泉州府志慥字端伯懷之從兄初爲尚書郎直寶文閣奉祠博學能詩號至游居士

曾懷

按泉州府志懷字欽道孝寬曾孫建炎初知真州訓習民兵有紀律乾道初擢戶部侍郎進權尚書知婺州甫三月召還賜同進士出身參知政事代梁克家爲右丞相封魯國公淳熙初臺官因言事
中懷懷遂求退以觀文殿大學士奉祠未幾復相以疾請罷卒

曾植

按泉州府志植字子直晉江人太學上舍生孝宗登極賜釋褐累遷勅令所刪定官司農寺丞會大